

四庫全書

集部

欽定四庫全書

集部

石倉歷代詩選卷二百一至

詳校官庶吉士臣范逢恩

侍讀臣孫球覆勘

總校官進士臣朱鈴

校對官中書臣葉蘭

謄錄監生臣姚舒

欽定四庫全書

石倉歷代詩選卷一百一

明 曹學佺 編

宋詩七十八

崔與之

壽州趙守

大夏開朱明物態豐且碩薰絃發新奏生意轉無極間氣清而和融結賦有德碧梧挺幽幹曠度漫九澤富哉

學古胸仁義供服食渾璞希世珍外溫而內直驛駘開
道路聲光日斯赫九闕通籍初南來墜雙烏片心清徹
底杯水餞泥軒京兆入幕賓去天不盈尺佳最入聰纊
行行陟文石邕爲五官雄地控西南域專相難其人弄
印無以易袖却經綸手天邊樹牙戟猩猿叢篁中深棲
而屏息夜月照銅柱警囊聲寂寂邊人解帶卧危地成
樂國屏風御墨鮮早晚來召驛愧我樸檄才潦霧甘遠
役題坐遇知已孤根費培植崧高生申旦好語誼井陌

碧油塞雲端阻莫陪賀客歌詠淇澳詩清修如圭璧他年玉班頭蒼鬢而赤黻

柴秘書分符章貢同舍餞別用蔡君謨世間萬事皆塵土留取功名久遠者之句分韻賦詩得世字

玉立蓬山巔聲望高一世清秋玉壺露耿耿無纖翳中流屹砥柱愈激而愈厲平生學古胸非爲資身計中邊事方殷命脈實關繁憂世危明王誰流洛陽涕直諫逆

披鱗言言皆獻替胡爲厭承明退飛勇且銳有山鬱而
孤雄踞虎頭勢民貧困科擾椎剝已無藝猩猿叢篁中
跳梁無虛歲弄印無以易要起百年弊西風吹馬耳新
涼雨初霽尺札聞先聲遠氓已懷惠旌旗簇小隊畫戟
森兵衛一方覆孟安中原誰共濟顧我亦漫仕空山老
松桂勸海作歸夢乞身尚濡滯著鞭公已先脂秣以相
繼

送夔門丁帥赴召

議論方前席功名早上坡去帆底蔓水遺愛竹枝歌同
志星辰少孤愁暮雨多倚風窮望眼碧色渺平莎

送范漕赴召

獨汲千尋綆推開八面窓相逢俱氣許未語已心降分
鎮中邊蜀歸途內外江禁林風雨夜應念鹿門龐

送時漕大卿淮西簡法

卿月高華照楚墟澄清雅意見登車星分屯壘雲中戍
風引船艎塞下儲十二聚民行惠政三千議獄謹刑書

最聲烜赫流聰纊聖詔今朝下玉除

其二

十年宦海任飄零
豈料光華伴使星
落魄半生頭已白
爬沙一見眼長青
天涯明月方依樹
淮上長風忽散萍
別淚誰能効兒女
不堪官柳暗長亭

張進武善風鑒謂余
翁骨日聳非晚入臺求詩

贈之

熒熒碧眼照人寒
一別重逢歲又殘
老去但求閒處樂

君來猶作向時看誰將伏豸夸顚骨我有盟鷗託肺肝
坎止流行隨所遇何須求夢到邯鄲

楊州官滿辭后土顯王立亭

天上人間一樹花五年於此駐高牙不隨紅藥矜春色
爲愛霜筠耐歲華四塞風沈天籟寂空庭月冷市塵賒
臨行更致平安祝一炷清香十萬家

嘉定甲戌正月以金部郎分閩東淮正當金人

棄巢南奔之時人不願往以君命不敢辭首

尾五年而不得代戊寅臘月以少蓬召而病
且衰矣自知不堪世用決意南歸舟次豫章
三疏乞閒而不得請憮然東下艤棹南康重
湖閣夜夢人告之曰死於廬山之下覽而識
其事并以小詩謝山神

來到廬山日日陰斜風細雨亂雲深移舟夜壑人間世
荷鉢春郊物外心要把封疆安社稷誰教軒冕換山林
殷勤招隱知深意五老來朝露玉簪

寄黃州趙別駕 壬辰入蜀舟次黃岡適趙倅
奇夫沿檄行邊不遇以詩寄之

銅梁玉壘碧雲端尺舸西風兩鬢殘世道多岐今已慣
人生一見古來難丈夫不作謀身計巧匠那能袖手看
月白風清雪堂夢銀波萬頃卧龍寒

石倉歷代詩選卷二百一

欽定四庫全書

石倉歷代詩選卷二百二

明 曹學佺 編

宋詩七十九

吳 儼

子吳子某既結茆竹洲以娛親復於居之前沼爲亭以朝爽名之蓋亭西面於晨興看山爲宜

宜

抱甕自灌園勝遊貴人門有口自酌酒勝與俗人言園中多蔓草晨夕費鉏芟遇夜或風雨安得久盤旋惟有古斷簡言行皆聖賢讀之未竟篇眇昏如夢間讀竟亦何爲是非徒囂煩何如池上亭虛曠可看山山色日夕佳晨興夜氣還宴坐日過午清陰猶未遷

題新安僉廳柱笏亭

高山如高人可仰不可攀山中老鉏犁山前走車轍終日對屏巖如目不見睫高人與高山千里風期接妙思

入青冥毫端寄明滅况復簿領中見此寒岌業悠然境
意會芻豢端自悅手板亦何爲趨走背汗浹從渠且倒
持吾自支吾頰

題騎牛圖

陳仲舉賢良熙寧中言新法不便謫南康酒稅
秦兩黃犢時與劉凝之跨之遊廬山李伯時繪
為圖今藏其家

汗血聲利塲舉世循一軌霜風老駔鰈松路石齒齒牛

瘦僕夫疲累累山谷裏兩翁非病狂顧獨不取彼牛背
有佳處未可語俗子夷齊向千載凜凜有生氣試問齊
景公烏用馬千駟

代陳無已述懷

胡馬嘶北風越鳥依南枝人生有氣類千里傾風期君
看漆室女中宵倚檻悲從君不憚遠秋露濕人衣南山
白石爛漫漫何時旦獨立占少微搔手空三歎

次韻南軒先生榕溪閣閣山谷所名也

紹聖用事臣黨與紛相穆當代幾忠良一朝咸黜幽太
史坐直筆愈黜名愈休消長闊否泰天意匪人謀累臣
誰司城獨爲景物留當時西復南萬里不停輶誰知百
年定欲起九京遊積莽新陳迹寒泉薦冰甌想當千騎
臨水木寒蕭颼我公今伊傅茲焉少夷猶炎方凋瘵餘
公來今已寥榕溪雨甘棠千載誰劣優太史後凋松公
如巨川舟

汪叔耕見訪不數日別去惡語爲贈兼簡子用

子美二友

負釁得老窮掃軌事幽屏楚然羅雀門有客頑而整悲歡十年別樽酒清夜永妙句時驚人盈軸肯傾高三日語未休霜寒夢歸省臨流分別袂波光照孤影重念吾故人雪屋清燈冷天晴風日佳何時過鼴徑石鼎燃豆萁冰菹煮湯餅

宿神潭洪氏醉經堂

久客急歸程風雨事馳驚黃流鳴澗壑餘波或被路堆

墮珠聯屬石徑齒齟籬輿湍危登杖策阻深度行行
忽半岡神潭渺東注徒旅鳩後先煙火休薄暮主人延
客入大室千卷聚醉經揭佳名巨軸舒新句我亦舊高
陽糟粕嘗已屢人言薄滋味舌根恐未具君但中聖賢
當自知佳處

題祝聖寺浮梁道中

金碧照征途松竹開幽徑山僧壽八十腴貌精視聽囊
鉢罄錙銖棟宇事嚴整如公方外人視世一泡影辛勤

畢此生更欲傳不泯當家茀父菑居位蠹國政視公豈容誅三歎發深省

楊村道中邂逅趙仁甫

脩途轉清溪孤村帶寒日瀟灑竹間亭意行成小立賓主莫誰何悠然良自適俄有貴公子胡驄搖寶勒下馬相勞苦呼酒道疇昔遂令麋鹿姿頗爲人物色佳實進霜堅異釀引寒碧興盡還獨歸沙頭寒月白

題陽山寺

憶昨去家初涼風肅巾屨間里重遠別祖席煩親故期
會趨晷刻倉卒戒徒御首尾徧吳楚復退分擣處歲月
拂塵壁廊廡識故步故人新絳帷方屢盈外戶褰裳喜
我來寒溫問良苦樽酒開驩顏難黍羞珍具欲少爲君
留歸心已先驚年少未仕時飽食廁庠序束書事遨遊
光陰等閒度一爲升斗糜奔走窮朝暮欲學不可得雖
悔復誰諉諸君其早圖前覆戒吾車

獨酌

松竹開幽徑蓬蒿閟荆扉庭前兩梧桐濃綠涵清輝南
楹開半山晨夕異煙霏樽酒自賓主禽鳥更壎箋飲罷
兩無言還讀淵明詩

早起

積雨霖窮秋柴扁立清曉溪光照煙岫未覺秋容老溪
邊鳥臼林他日沒飛鳥濃綠半枯枝殷紅亂衰草搖落
想騷人洞庭風嫋嫋

晚步

水靜偏明眼山高不受塵晴沙棲白鳥野渡集歸人問
字誰持酒行歌有負薪娟娟孤月影獨覺向人新

弋陽道中

積雨今朝霽東皋晚日紅人家深蔽樹野水闊浮空久
客仍行役青春已過中嶺頭凝望處腸斷白雲東

和唐秘校見貽長篇

君才離奇卧壑松力回萬牛匠非哲我如坎井可窺底
短綆未汲先自竭饑寒驅置簿領中巧匠旁觀指濡血

逢人首下尻益高敢遇督郵腰不折憧憧往來窮朝昏
負負江湖弄風月邑雖陋室無佳士稍輸城府開私謁
平生聞人說項斯秀句秋江更清澈颶徑經雨忽蛩然
傾囷倒廩不我屑渥洼汗血絕後殿天球河圖合前列
要知冷暖須自知舐蜜中邊不容說癡兒徒癡不了事
相留湯餅未暇設如今豈止傾蓋舊向者固已聞風說
命之窮達有宿分男兒功名在晚節未應種豆趣南山
試一上書干北闕君不見少陵流落老更窮長歎自此

稷與契

遊古巖舊嘗侍孫先生題名

白日瀟瀟松徑靜紅蕖冉冉洞門深風涵廣宇生虛籟
夢破西窓上夕陰景物眼前渾似舊塵埃題處忍重尋
羸驂落日孤村路塵土依然滿病襟

過叢桂堂故叔祖教授讀書之所

古瓦頽坦迹已陳孤猿別鶴自哀吟可憐叢桂煙蕪沒
惟有平池春水深秀木千章新過雨寒山一帶暮傷心

清風明月時來此夢斷雲飛何處尋

和呂守環秀堂二首

一州如斗帶溪山空翠家家遶畫欄丘壑自非胸次有
雲煙誰暇靜中看衣冠共識家風在閭里方知漢法寬
戴白垂髫相與語今年有飯飽加餐

田家但識豐年樂見說花城日更長如獲從公時拄笏
尚能援筆侑飛觴雞豚社甕年年酒柿栗園林樹樹霜
更倩漁郎問樵徑深山深處是吾鄉

清明陰雨呈同舍

薄薄輕寒作許陰村村花柳爲誰新良辰欣見百五日
冠者仍餘五六人冷雨淒風連午夜飛花流水一年春
窺園未阻江東興陌上應多翠黛顰

寓郡城客舍熱不可寐與程彥舉坐語達旦
淡月微雲對倚樓無聲河漢自西流高城忽起梅花弄
散作晴空萬里秋

偶成

宵來一雨破炎蒸
蕉葉葵榴照眼明
稍與燈花尋舊約
却嫌庭樹作秋聲

趙同叔開軒植竹以自娛樂諸公雖爲賦詩而
未嘗有見之者某不日北歸同叔亦爲楚令
尹矣詩以餽之

庭前新月已如霜
倚玉縈風別是香
說與東君須早計
扁舟早晚下瀟湘

寓壺源僧舍二絕

燈殘掩卷已三更
風露涓涓月滿庭
閒撲流螢衝暗樹
危梢點點落寒星

歸來閉戶還高枕
窓隙微通月影斜
風急忽驚烏鵲起
空階簌簌墮松花

簾送人詩代簡

幽窓相對小匡牀
藍淺紗輕水麝香
退食歸來高枕處
滿林風雨夢瀟湘

題月巖

題詩山寺不勝多人力爭如造化何安得短蓬巖下瀨
長看清影照寒波

己卯之冬月餘端坐無以度日因聚諸童幼極
其歡笑時與相說謎雖鄙俚不稽至於可笑
輒爲絕倒因戲爲數語示之

滿身珠翠間花鈿舞到梁州最可憐一捻宮腰如束素
清風明月畫堂前簾

楚楚衣裳兩頰紅冠兒斜墜腳兒弓夜來塞上無消息

玉筋偷彈對曉風 雞

石倉歷代詩選卷二百二

欽定四庫全書

石倉歷代詩選卷二百三

明 曹學佺 編

宋詩八十

李彌遜

自毗陵與兄弟避地南來約爲連江之歸中涂各以事留遂成獨往念茲離亂易於隔絕作詩

胡塵暗中原大駕巡江都春風送南渡百辟咸奔趨衣
冠因陵暴川陸紛舟輿微生本萍寄寧復安吾廬褰裳
犯深險顛仆妻與孥懷恩痛未報無路先貔驅巖穴多
遺賢天網固亦疏驛驘懼捐棄未數十家駕銜悲望君
門忍作永訣圖扁舟兄及弟去指東海隅夜榜亞脩舳
曉帆趨橫浦如何忽參商行止分半途怡怡風月夕來
若同隊魚慘慘霜露秋去如獨翔鳬歲晏道路長隻影
誰與俱但憂赤眉間能致黃耳無青燈攬寒夢起坐中

腸枯載歌鵠鵠詩引淚零襟裾

同天隱少章遊嵩山懷元明

秦公我輩士早踏翰墨場萬言若投石十年猶枯囊苦
欲泛江海有親在高堂牢落京華春門無一壺漿長鞭
策瘦馬送我古道傍憐我值險艱赤心寫推傷鏗鏘五
字句勢與鵬鶴翔感此坐矯首星星鬢成蒼西風小搖
落雨洗煙嵐光嶂曉露孤秀野陰棲暗芳更攜鮑謝流
歷盡千巖霜搜奇得幽深訪古到渺茫月落潭影空清

吟殊未央緬懷紫芝宇百憂繞廻腸三歎已晡食十起
中夜牀雲埋長安日魂夢不敢驤茂苑富山水結廬余
所嘗我欲放船下卜隣俯滄浪耦耕種秫田共掃三逕
荒頭白青山裏長歌樂歲觴

承天寺

宿雨洗蒼骨峰巒發新秀尋幽躡竒蹤騰踏衆山圍層
林鎖巖隈突兀見危構空高望浮黎靜聖逼靈驚我來
風雨秋白露欲昏晝但聞百川赴鳴玉瀉寒竇岳示闊

嶮峨路絕不得遙攀緣仰脇息坐石俯長溜帶露摘山
芎披榛覓仙酌山光晚逾清雲壑若相授終期爛漫遊
陽鳥欲回味更約十日留之子緩蹄轔

法王東庵

吾宗丘壑資耿耿抱幽獨結構祇洹家縈迴轉巖腹前
川布黃金合嶂來蒼玉步出覺華天乘凌眩生日雲間
起層林林際懸高屋斷砌滴疎泉微蹤隱深木堂空貝
葉昏苔盛半堦綠朱幡久不來哀猿響秋谷

五松寺

秋風吹客衣去路
倚天碧躋攀一何苦
政坐愛山癖人言
五松下曾是瞿曇宅
至今梧竹陰列屋
棲禪寂塵纓得暫解
俗駕聊可息怡顏
巖間樹洗耳泉上石
孤雲共還往竊窺去
無迹道人粲急流獨步
少林席客來了不言
碧眼照庭栢希聲出鐘梵
妙意生牆壁寒灰暗青燈
偶坐遂終夕歸來人境空
缺月挂山額

次韻仲輔山中之作

崖陰坐清暝目爲山光注妙意不可名悠然與心晤疎
泉石中鳴落葉衣上住冷風起虛籟還向無中去三生
聽鐘魚偶失來時步佛屋倚秋風團團兩桂樹却疑此
境中曾是經行處

碧霄泉

山根出清泉云自九天落風潮帶江腥天黑魚龍泊何
當寸雲敷一灑徧寥廓滄浪勿復歌吾纓久已濯

秋居雜詠

青春背我去白日不吾謀霜飈驚草木寒威戒衣裘寓
形復幾時四序忽一周世路伏劒戟中懷孕螟蟲營營
事長久頽齡如置郵丘園倘未卜悟悅心自休

其二

窮秋雜花遠眷此霜下傑明金委珞瓔寶璐綴環玦依
依風遞蘭皓皓日穿雪若無天治姿不受衆目悅銜觴
泛其英攬之腸爲結誰能踵高門持以浣中熱

其三

公園十畝餘日涉亦成趣浮陰未全收晴沙已勝步杖藜相與行童稚雜冠屨枯魚泳微瀾悴菊飲晞露欣物各有時撫懷偶軒慮安得三逕餘誅茆種瓜芋

晦陽軒

山高竹柏陰得之近亭午茲軒揖朝暾精色快先覩濛
濛勒花春十日九風雨羲和爲反旆照我衣上縷眩然
九陽遊誰云在環堵

次韻明甫西園之什

莫作原上紅寧爲徑中綠多花必早彫依依不如竹一
枝寄他林翛然傲華屋填饑飯秋英借健膏石斛坐斷
百懶身無心問雞足

暇日約諸友生飯於石泉以講貧居之策樞密
富丈欣然肯顧賓至者七人次方得順和貧

士韻人賦一章

崔嵬孔明柏結陰衆所依移根天衢上曾撫日月暉如
何去大廈却繞烏鵲飛終當煩萬牛挽取廊廟歸鄭公

澤既遠何以慰調饑公其踵前脩一洗貧士悲

歲戊戌秋舟行宿泗間有持小石售於市者取而視之其大可置掌握峰巒鬱然若巖竇澗壑水落月吐雲影渺冥若遠若近皆有自然之勢乃以千金購之而為之名曰羣玉峰曰水月巖曰遙岑曰碧澗置諸座隅卧興之對且余少時南遊匡廬升紫霄以瞰九江東沿洙泗登泰山而徜徉大伾道鄰歷趙及燕而還今年責官羅

城當走蜀問山於蜀人馮濟川每至佳處耳傾
心受恨不能一日千里也繼改命不得往遂自
鄭適洛以窮隋渭兩河之源歷覽二室之趣方
將踰淮浮江自放於世猶念深山大澤不能與
有足者皆至偶於圖畫對之未嘗不慨然興懷
今一旦得是數山坐眺四方之勝豈不幸歟吾
將寓形其間而與之俯仰上下不知我之在丘
壑丘壑之在我也好事者將以余為過耶姑從

而為之辭

羣玉峰

五城十二樓高下聳寒玉天空開翠微不受塵土觸半
生嗟環轢萬事驚轉轂寄語山中人爲占一峰綠

水月巖

明泉落巖隈滿月挂山額疎星淡河漢下與水光白了
然心境空炯炯照真宅鴻鳴夜更清欲卧已終夕

遙岑

宿雨洗空澗出此方寸岑聳綿翠光浮妙巧不可尋飛
雲去未返慰我千里心誰爲具徽絃有酒聊自斟

碧澗

蒼崖高巒盤下有千仞傾當時捐珮侶寄此琤琮聲坐
石風露晚心與秋月明滄浪若可濯毋負冠上纓

宿楊州城外

舟行遙城郭缺月疎林杪窈窕一溪深微茫衆星小忘
言對詩書適意親魚鳥幸此絕紛華行歌閱昏曉

和少章喜晴

日暮馬行疾峰巒過眼頻雨暗長苦夜晴谷似逢春風
月起歸恨江天思故人機心渾已盡惟有白頭新

發光林寺

朝發光林寺崎嶇渡復攀樞衣緣翠濕側足下蒼頑急
雨欲平澗斷雲時見山祇應超勝地行路不知艱

久雨阻遊昭亭有作

浪迹隨方寄窮途觸事諳雨逢春甲子江滿地東南客

鬢霜前落詩情酒外酣上方愁獨往藜杖許同參

琴溪

竹色千鍾靜溪光一鑑開巖隈宿風雨人迹老莓苔控
鯉定何在騎鯨今不來空餘泉上月與我共徘徊

春日雜詠

春到陵陽市人家泊翠微南亨甘入筋北戶暖生衣花
暗昭亭寺魚肥句水磯樂遊須結社倒著接籬歸

其二

幽棲足春事晴日苦相催屐齒穿沙穩筇鬚礙竹回光
風初轉蕙殘雪欲欺梅自是經過少柴門日日開

其三

役役炎涼態悠悠道路賒情懷知老大夢幻閱紛華攬
思雲邊樹供愁雨外花生涯書一束到處即爲家

其四

二月忽已破一春強半過提壺工喚客布縠巧當歌得
酒先愁盡惜花翻恨多逢辰不爲樂明日復如何

早入昭亭與同遊散步還僧舍飯

散策春岡曉樵蘇一徑長釣衣藤掛石斷路水浮塘山
靜竹生韻池清蘭自香禪房得深憇漁鼓正鳴廊

再遊龍潭

密霧開深徑幽奇得重行水光沈樹色人語亂泉聲仙
去山容寂龍遊雨陣輕誰能築雲室千古共淒清

池亭待月

輕雷不成雨風砌旋揩牀山亂雲行曲樓高月路長柴

門非故國戎馬尚他鄉笳鼓悲清暝關河思不忘

散策

散策北崗路牛羊歸徑深水窮人小立山靜客微吟點
稻花雨團團榕葉陰田翁罷爭席明日共幽尋

次韻曾德明司理留題西山兼簡蘇宰

層軒無礙石支徑曲穿林竹密催山暮松搖亂客吟琴
書虛室冷鐘鼓靜坊深誰謂溪坡遠能來杜與岑

夏日與妙現老堂二公晚步江皋露坐月下夜

分乃歸

胡牀興不淺未肯庾公賢山意知秋近江聲到寺前夜
涼新病後月色正愁邊可惜江南夢青燈照不眠

贈別竹西王彥升居士

參軍四壁生秋草鬢毛不似心已老終隨煙霞學巢由
一室安能事除掃竹西舊說青雲客詩思長留意無極
塵埃不見襄陽山賴有斯人吐消息赤心照日青眼明
與君一見輸生平君去摩天學孤鳳我今飲海盤長鯨

雲車輶兮風馬休呼兒乞取千金裘明朝有句道不得
黃葉滿庭無限秋

行路難

江心蟠石蒼虬立山激江流浪頭急風昏月暗魚龍愁
電掣雲奔鬼神入船頭星斗天爲低夜潮生寒洲渚移
鳴舷鼓枻驚楚子危檣遠纜號吳兒篙師咄咄自相語
明朝扁舟繫何許半月江行十日風寸步家山隔秦楚
黃衫年少金雕鞍日高華屋春夢殘挿花走馬咸陽道

世上空嗟行路難

歲後三日與羅叔共二邵似表弟席上分梅花
年後多韻得多字刻燭成

春風一夜如鳴鼉殘香暗粉驚辭柯新春三日駒隙過
花前百罰寧辭多男兒莫遣兩鬢皤舉觴不飲理則那
酒酣不用吳姬歌短鬚尚足供吟哦坐中鮑謝偕陰何
語如韶濩參鳴珂鏗鏘入耳痊沈疴豈獨使我衰顏醜
我今官閒得婆婆遲明更上梅花坡

虞仲通判以溪聲名軒約同賦

山根出泉瀉鳴玉上有蒼崖擎佛屋無風水石自撞觸
不盡潮聲發寒谷宰官豈是雲間陸舊識南泉生處熟
當軒大榜與名目平地重翻偃溪曲曲中時轉三妙語
一一聲音談佛祖喧逐噫視十方鼓萬壑風雷送煙雨
此聲不屬聞中取六鑿相攘竟誰主後來紛紛何足數
五乳峰頭曾賺舉山翁有耳百不聞團蒲曲几窮朝昏
何時沿溪掬寒綠掃葉煎茶睡初足

客誦故人劉立道梅花詩有懷用其韻以寄之

桑柘如錢柳如雪南村北村欲蚤月老翁飯飽摩腹行
白鷗自隨閒換鐵攀花正恨顏色乾噦公七言毛骨寒
惜花不似愛詩苦即遣愁海回狂瀾公今爲郎尚黑髮
仕路不應嗟歇滅江國官閒來雁多莫使故人書斷絕
春風步馬芳蘭皋思如哀鴻獨求曹幾時懷抱相對盡

桂漿酌斟供詩豪

遊龍潭

泰山破碎天來女媧仙去空嵬崔中懸鳴玉三千尺
下有百仞青銅開居龍變化出噓吸雨暗雲昏鬼神入
我來坐石秋水閒雲影扶疎落空濛浮丘容成不可俟
摩挲青壁看名字兩翁下遊會有時訪我鍾陵五松寺

次韻碩夫池亭賞蓮

胡牀塵尾揮長柄風和入座花容靚乍開還合晚照中
脩竹佳人倚春暝此間此景樂最深世路好惡君酌斟
下車何必笑馮婦投杼未免疑曾參江山信美來者稀

淵明獨與田父違誰云寧食艾三畊不如杯行莫停手
黎道人自長沙入閩邂逅見之論易頗有所得
自言居醴陵山中有田廬養魚種竹可以卒
歲作取足庵義方堂優游其間藏書教子甚
樂也遽還求詩贈之

兩脚不踏咸陽塵兩眼不逐瀟湘春胸中乾坤照萬古
奇偶縱橫何足數閉門有竹食有魚遺子有田家有書
一生可了心自足世上紛紛謾榮辱

山行遇雨

滄溟四乾青虬立碧雲摩霄高巒峻六丁夜挽天河傾
石骨無塵露蒼濕長風吹雨不成絲飛鞚衝山帶煙入
羲和回馭還青冥布穀催耕喚春急

獨宿昭亭山寺

山寒六月飛霜雪樓殿夜深鐘鼓歇琅玕無風萬戰閒
屋角明河掛天闕龍牙七尺玉壺冰炯炯神清夢不成
可憐幽絕無人共卧看雲頭璧月生

與公序避暑石盎方晝欲寢聞林間禽鳴甚樂

因得小詩云

一林啼鳥不知名應怪山翁此地行化蝶與周俱是夢
遊魚知我久忘情胸中丘壑真餘事世上功名畏後生
但得盈樽供自酌何妨人境卧淵明

春近風日漸佳與似表弟開小戶縱步後庭

圍爐人散長寒煤暖日還催墐戶開春近郊原思夢蝶
雪殘池館見真梅客愁宛轉凌雙鬢歲律侵尋寄一杯

試繞小欄尋翠甲履痕猶占舊蒼苔

雲門道中晚步

層林疊巘暗東西山轉江回路更迷望與遊雲奔落日
步隨流水赴前溪樵歸野燒孤煙盡牛卧春犁小麥低
獨繞輞川圖畫裏醉扶黃髮杖青藜

渡橫溪

百尺滄浪兩岸沙肩輿徒涉步欹斜溪聲猶帶夜來雨
山色漸分雲外霞岸曲斷林開鳥道水邊疎竹近人家

塵埃何處尋真境試逐寒流認落花

次韻學士兄富陽道中

長江送客靜波瀾路入回溪第一灣石瀨橫陳潮力減
風檣園轉櫓聲閒驅除方寸無窮事領略平生未識山
自笑疎慵似中散政宜寥落水雲間

訪雪峰真歇禪師

紅塵白髮不相投來就僧房借板頭大士法中龍象貴
老翁心外水雲浮長蘆江靜千山月枯木巖寒一葉秋

別後相逢重著語牧童橫笛倒騎牛

次韻錢申伯山堂之詠

淨坊秋色老蒼顏簷額飛雲細可攀客夢偶隨疎雨斷僧遊長帶暮鐘還似聞遺錫藏銀地親見高人住土山愁絕寒江歸去路亂峰青處望雙鬟

和錢申伯遊東山聖泉

偶脫塵中一夢闌欲窮幽事徧尋山靜憐人境雞虫擾老愜僧窗枕簟閒十里秋香隨屐齒四更山月上簾顏

登臨物色催詩興未信天于我輩慳

初到連江和林公瞻先輩

投老身名信陸沈空將白髮寄遙岑賦詩未敢師彭澤
抱甕真堪友漢陰江回兆橋誇壯麗山腰卧石閟幽深
公才清絕參奇觀慰我長年去國心

和陳穎仲題劉鞠祠

山繞平湖綠四邊兩翁遺澤到今傳蘋風引釣魚隨艇
穀雨催耕水拍田敗壁丹青悲落日荒庭紳笏想流年

桐鄉不廢春秋祀簫鼓雞豚久更虔

和穎仲山行即事

平蕪新綠占封圻橫路遊絲網落暉山徑人稀藏窈窕
禪扉春盡老芳菲緩行照水知魚樂隨意穿花見蝶飛
二子昇籃今夜月龍鍾猶勝杖藜歸

暇日遊石門用前韻

曉御欲隨風脚來報晴烏鵲入簷催松幢竹蓋寶坊近
石壁雲闊塵境回山氣得春濃勝酒花光帶月冷過梅

却收眼力尋歸路惜取餘青莫浪開

久雨

榕根敗屋兩三椽客徑無人老更便地近東南多澤國
霖逢甲子少豐年徑須酣飲六十日安用取禾三百廛
待得雲頭風力健梅花如雪月初圓

德甫知丞過筠莊谿亭爲待月之會戲呈席上

諸友

載酒何人過子雲傳呼雞犬亦驚奔門無車馬苔侵逕

坐近池臺竹覆樽好月邀人留晚照疾雷催雨過前村
獨醒楚子真多事共醉愚溪百尺潭

自連江赴守鄱陽黃原道中作

海角三年一夢成北來重聽偃溪聲凝雲帶雨留愁住
茂樹隨山送客行杭稻沿崖畦上下茆茨枕谷路縱橫
莫從馬腹消雙髀此地真堪老此生

舟中對月

悠悠逐隊寄舟車與世真成一夢蘧若憶曉更鼈報鼓

喜逢秋遠雁橫書江山似與詩人助水月應知靜者如
投老得歸隨處樂獨醒尤笑楚三間

留別傅才孺

壯歲追隨鬢已蒼誰將勲業問行藏憐公錯莫雞羣鶴
顧我凌兢虎質羊敗柳亦工喧暮雨寒花直欲膩秋霜
更謀濁酒窮清夜明日山深木葉黃

再用葉碩夫韻

一丘一壑半生中旁舍小兒今老翁歸來賦就晚逕綠

醉時歌罷春燈紅壯心欲盡孤雲薄昨夢不留寒月空

茗碗粥盂能事畢四三朝暮付狙公

題福唐郡園清閟亭

公餘自種南堦竹好事風流今未聞但得七人來結友
何須千畝比封君風稍不定微藏日雨葉初乾薄帶雲
自是甘棠人愛惜不憂寒谷遇樵斤

五言

醉帽迎風落春衣日徑斜花梢藏密路隱約見山家

其二

白玉千株暗青雲一徑斜從來少車馬恐是阿環家

遊梅坡席上雜酬

風約疎梅蘸石泉山涵弱柳借厨煙竹籬茆屋傾樽酒
坐着銀鈎上晚川

次韻學士兄秋初

何日刀頭水石間婆娑猶得一官閒杖藜早晚尋幽處

望斷秋空不見山

次韻林仲和筠莊

疊疊重重兩岸山
鈎連秀色上琅玕
孤亭四壁靄煙雨
人與白鷗分暮寒

題趙幹江行初雪圖

爪步西頭水拍天
白鷗波上寄長年
箇中認得江南手
十里黃蘆雪打船

次韻郎中弟見寄

筠溪岸上千竿竹
夢想猶疑玉笋班
只欠吾家小居士

杖藜風雨亦來還

石倉歷代詩選卷二百三

欽定四庫全書

石倉歷代詩選卷二百四

明 曹學佺 編

宋詩八十一

王十朋

觀國朝故事

昔在元祐初朝廷用老成元惡首竄殛賢雋偕棄征簾帷八年政內外咸清明四夷各自守天下幾太平紹聖

黨論起曲學尊金陵忠良投海島黨籍編姓名春秋亦
獲罪學者專三經心術遂大壞風俗從此傾養成前日
禍中原厭羶腥我欲著一書善惡深勸懲姦諛誅朽骨
潛德發幽馨六賊未足罪禍端首熙寧

送凌知監赴玉環次覺無象韻

晨興趣行裝秋色滿離席悲風苦送聲短晷頻移刻蘭
舟薄暮發去去轉遐僻極目望官所沈沈煙靄積清有
濯纓水白有漱齒石悠然水石間宦情閒自適朝焉遊

其南幕焉戲其北彼微山中鳥亦將識公德公無賦歸
去田園付人役

玄鳥至

昆蟲方啟戶玄鳥亦知辰去自盲風候來逢化日春深
條煙雨濕廣廈羽毛新故壘尋遺跡雕梁拂舊塵早鶯
宜結友秋雁不同賓嘉爾能知義無忘舊主人

其二

孟夏遊會稽禾稼方薿薿南風翼新苗生意殊未已重

來覺非久相去百日耳黃雲萬頃空蘋末涼風起園林
亦搖落觸目成疑似人生過隙駒容華烏足恃朱顏向
迷塗奔走不停軌得失無榮辱歸來實堪喜

其三

直道疾伊優壯懷增靡曼海上豕方牧夜中牛屢飯半
生營一名偃蹇未如願青銅忽自照白髮已堪歎斥鴻
適蓬蒿大鵬搏九萬物情貴得所奚用求自獻富貴似
可喜貧賤亦何怨

其四

秋懷蟲共悲秋夜鶴同警輝輝玉繩低耿耿銀漢永靜
思鳬鳥喬遐暮螭蟠猛途遠慵著鞭井深艱下綆烏倦
當知還馬失亦云幸窮通委大命塵慮可深屏窗几生
新涼燈火照初暝省已有昨非探懷無宿穎

其五

古書恣掀翻古意薄窺瞰心將遊寂寞語復攻苦淡實
淺名忌浮才疎得懲濫守志懼不堅入道恐成暫性天

戒戕賊心猿思繫纜有友頻琢磨無官自校勘澹然學
揚雄不恨儲無瓶

呻吟

呻吟有遺士妾懷葵藿心朝夕傾太陽不耐氣穢侵肝
膽有古劖願言決羣陰茲志尚鬱鬱抱膝我悲吟

其二

古道日云邈古意誰復知陽春漠無和流水空含悲郢
曲變新調鄭聲入朱絃喟然三歎餘默與羲黃期

其三

飛飛古帝魂，哀哀寄春怨。
興鄉節物新，故國人事變。
訴亡誰肯憐，啼苦血空濺。
雲安再拜人傷哉，不復見。

其四

周公代武王，大義一古傳。
人孰無兄弟，急難斯見焉。
願懷周公心，無愧詩人言。

其五

儒冠誤身世，偃蹇二十年。
豈不懷明主，富貴乃在天平。

生學忠孝自致無由前青燈照長夜感激徒自憐

思友

夜雨暗點滴窗風冷掀翻藜牀寤幽獨好夢俄驚殘故人
在何處遠隔煙水村欹枕不復見傷心涕汎瀾

遊簫峰

蠟屐穿雲去山深喜路通人家煙色裏古寺水聲中金
濺星猶在丹成竈已空吹簫人不見臺下想仙風

宿黃巖妙智院

誰能千里贈相思
梅花正發思家切
竹間水際出橫枝
暗香疎影和新月
自是離情禁不得
觸物那看此時節
春前臘後定歸來
要看溪上千株雪

左原紀異

樂清之東地名左原中有古井深數丈時冬旱水
枯泉僅盈掬有女子數人提罌而汲縛絕罌墮俄
有男子銳然解衣入井取之既而石陷聲震山谷
井深而石重咸謂壓者必葬粉矣越三日事聞於

邑尉周公以職事來環井而視惻然嗟悼命僕夫具畚鍤挾石取骸將以葬焉自旦逮午猶未及尸俄而役者驚相告曰井底有聲其鬼物乎公曰此陷不死須吾以生於是捐己資募能出之者衆力爭奮頭顱稍露而語可辨矣土石撼動勢將復壓救者驚潰公乃振衣梵香叩井而拜命工植板以捍石危而不墮益以緝錢啗役夫俾蹈死以救公未飯吏以進郤之曰必活人而後食日沒井昏繼

之以燭用長綆繫食挽而出之觀者數百人歡呼
震動嗟異其事且以手加額曰公真仁人也能活
人如此其家左原去井所爲近獲終日從公於井
旁目擊其事作詩一篇以紀之時紹興乙亥仲冬
四日也公名邵字嘉成婺州永康人

君不見溫公年方髫齡亂時奮然擊甕活小兒至今遺事
在圖畫活人手段良可奇又不見耿恭昔年因疏勒孤
城鑿井踰千尺整衣一拜精誠通俄頃枯泉爲飛液樂

清有地名左原地幽井古知幾年一朝陷溺誰氏子萬
石壓腦沈黃泉路隔幽冥生望絕三宿沈魂豈能活鬼
神欲救功莫施天遣仁人爲之出彩捧來臨驅五丁抉
石求尸俄有聲頭顱半露語未辨人疑鬼物相視驚拯
溺辛勤功未果土圮石欹紛欲墮爭言陷者不復生救
者旋遭頽壓禍梅仙惻然臨井旁焚香再拜祈彼蒼散
金募衆蹈死救人植板榦加隄防土石相銜危不倒蓋
粉餘生僅能保須臾奪命鬼窟中萬口歡呼喜填道翕

然輿論咸奇公異事行將達帝聰感物誠居耿恭上活人手與溫公同况公才學俱超絕吏隱那能久淹屈使君前日飛鶚章蒞事詳明已廉潔鯁生桑梓居此間具書目見非妄傳太史採詩倘見取願付銀筆書青編

柘溪道傍有斑竹百餘挺瀟灑可愛與先之賞覩移時因念鄉間無是種約異日移其根余戲誦君看江上千竿竹不是男兒淚點斑之句遂發一笑既而作數語解異世婦人之嘲

且志不必移根也

男兒有淚不染竹當作包胥賈生哭湘源移種雖可愛
節目尚餘兒女態誰能千里移此根出門又恐添啼痕
不如還家種慈竹簷前不厭千竿綠

送曹大夫赴行在所

西北連年殺氣高羣盜橫行如蝟毛廉頗李牧不世出
吾皇側席心焦勞汾陽自古多壯士曹侯意氣千人豪
年今四十猶偃蹇拊髀長歎淹龍韜慨然揮袂謁行在

報國已淬腰間刀
登壇拜將預指日
看君舉手清風濤

晝卧書懷

書齋終日無人過
閉戶便便事高卧
炎蒸爍體汗流珠
蚊蚋費拍蠅勞驅
南窗清風可供客
一枕萬錢無計得
夢魂未到鄉無何
起來搔首空吟哦

懷歸預別同舍

長念雙親垂素髮
不奉甘旨幾旬月
溪山雖好何如歸
吾心已逐秋雲飛
欲別良朋重嗚咽
催人啼鳥聲何切

明日琴書隨我東何時樽酒重相逢

家童拾栗因念亡兒作數語以寫鍾情之悲

去年覓栗嫌汝痴責汝曾賦淵明詩今年栗熟不汝見
淒然白骨埋荒陂西風簌簌黃葉飛家僮拾栗門前歸
汝兄汝妹爭來取汝父傷心淚如雨

傷時感懷

帝鄉五載亂離中億萬蒼生逃竄空二聖遠征沙漠北
六龍遙渡浙江東斬姦盜請朱雲劖射敵宜張李廣弓

借問秦庭誰慟哭草茆無路獻孤忠

脩竹

我得家傳好此君
剝裁千挺拂青雲
塵埃不掃自然去
風月有餘誰可分
萬籜蒼龍春後見
滿軒鳴玉夜深聞
時時助我毫端興
宜與江山共策勲

夜雨述懷

夜深風雨撼庭芭
喚起新愁似亂麻
夢想尚疑身是蝶
雨蘇方悟影非蛇
澆腸竹葉頻生暈
照眼銀缸自結花

我在故鄉非逆旅寧煩杜宇喚歸家

族兄文通贈山茶

野性無端喜種花吾兄偏爲贈山茶鶯聲老後移雖晚
鶴頂丹時看始嘉雨葉鱗鱗成小蓋春枝艷艷首羣葩
自慚欲報無瓊玖來往同看本一家

宿浮橋

落日丹丘下西江十里西浮橋通古道逆旅傍清溪夜
靜水聲細曉陰山色迷吾鄉在何處天遠白雲低

納涼偶成

架松却煩暑
梳竹來清風
頑然七尺軀
寄此微涼中
高枕傲有道
深杯醉無功
山林足餘樂
此興誰吾同

紅梅

桃李莫相妬
天姿元不同
猶餘霜雪態
未肯十分紅

海棠

欲與春爭媚
嫣然一笑芳
雨中如有恨
疑是爲無香

題靈峰

家在梅溪水竹間穿雲蠟屐可曾閒雁山新入春遊眼
却笑平生未見山

三宿靈峰不爲禪茶甌隨分結僧緣明朝杖屨丹丘往
帶得煙霞過海船

次夜余宿湖南夢齡猶在別業再和前韻寄之
一襟秋色已淒然雲水初空眼界田那更蕭蕭風雨夜
弟兄分影隔湖眠

題劉阮祠用過仙人渡韻

澗水桃花路易迷不同人世下成蹊自從重入山中去
煙雨深深鎖舊溪

石倉歷代詩選卷二百四

欽定四庫全書

石倉歷代詩選卷二百五

明 曹學佺 編

宋詩八十二

戴復古

夢中亦役役

半夜羣動息五更催
夢殘天雞啼一聲
萬枕不遑安一日
一百刻能得幾刻
閒當其閒睡時作夢
更多端窮者

夢富貴達者夢神仙夢中亦役役人生良鮮歡

飲馬長城窟

朔風凜高秋黑霧翳白日漢兵來伐胡飲馬長城窟古來長城窟中有戰士骨骨久化爲泉馬石亦嗚咽聞說華山陽水甘春草長

羅敷詞

妾本秦氏女今春嫁王郎夫家重蠶事出採陌上桑低枝探易殘高枝手難拔踏踏竹梯登樹杪心思蠶多苦

葉少舉頭桑枝掛鬢唇轉身桑枝勾破裙辛苦事蠶桑
實爲良家人使君何所爲見妾駐車輪使君口有言羅
敷耳無聞蠶饑蠶饑采葉急歸

題陳毅甫家壁

朱門金叵羅九醞葡萄春酌貴不酌賤酌富不酌貧君
家破茆屋飄搖河水濱中有一樽祿醉盡天下人

答婦詞

江山阻且長矯首鄉關隔空閨泣幼婦顰頷失顏色隱

閔鶴鳴篇寄彼西飛翼剥封覽情素既喜復淒惻別時
梅始華傷今食梅實覽古帝王結交游俠窟千金沽
美酒一飲連十日春風吹酒醒始知身是客杜宇啼一
聲行人淚橫臆衣破誰與紗髮垢孰與櫛勿謂遊子心
而不念家室新交握手行肝膽猶楚越醜婦隔江山千
里情弗絕慙慙揮報章歸計何時決今夕知何夕覩此
纖纖月此月再圓時門前候歸轍

栗齋輩仲至以元結文集爲韻

尋常被酒時歸到急投枕爲愛坎山文今夜醉忘寢偉哉涪溪碑千載氣凜凜春陵賦退篇少陵猶飲粧文章自一家其意則古甚太羹遺五味純素薄文錦輦牙不俗斯人異所稟君君望堯舜人人欲倉廩古道不可行時對窳樽飲

劉折父爲吳子才索賦雲山燕居

燕居適所息非懷傲世心白雲自舒卷青山無古今中
有動靜機杳渺諳素襟以時爲出處懷人撫瑤琴平生

披短褐時來或華簪世論倘不合矢口不如瘖避影長
松下洗耳清溪潯慎勿出雲外黃塵三尺深

婕妤詞

紈扇六月時似妾君恩重避暑南薰殿清風隨扇動妾亦
時侍君王常得沾餘涼秋風颯庭樹團圓無用處妾亦
寵顧衰栖栖度朝暮扇爲無情物用捨不知卽妾有深
宮怨無情不如扇

感寓

蛛網幕虛簷志飽羅羣飛寒蠶齧枯桑一身終繭絲物
物巧生理我生拙奚爲貂裘日以敝石田歲長饑食貧
已到骨噫氣儻未衰舉目送飛鴻悠悠知我誰夜雨挾
西風撼撼撼庭樹浮生堪幾秋青鬢忽已素鉛刀剗九
牛策蹇望長路所操莽無奇自好徒自誤改絃調新聲
履道易故步收功在桑榆其敢怨遲暮紅紫委路塵綠
樹有嘉色剝心晚聞道玩物若有得青春坐銷歇方茲
見真實人生到中年胡不保明德秋風墮庭梧棲鳳去

無迹矯首碧雲端一語三歎息

渝江綠陰九日燕集

佳節重有感人間行道難登高苦無地把酒一凭欄山
迴暮煙合江空秋水寒沙頭有鷗鷺莫作鴛鴦看九日
江亭上誰憐老益嘉要人看白髮不用整烏紗寄興題
桐葉長歌醉菊花歸心徒自苦猶在楚天涯

姪孫亦龍作亭於小山之上余以野亭名之得

詩二首

平地變丘壑安排若自然爲山移白石鑿沼貯清泉栗
里有松竹蘭亭無管絃軒裳非我事在野不妨賢
舍外有餘地登臨作此亭心如喬木古眼共遠山青社
酒誰同醉村歌自可聽有時來夜坐收拾讀書螢

桐廬舟中

吳山青未了桐江綠相迎扁舟問何之往訪嚴子陵高
風凜千古卧蹴萬乘主富貴直浮雲羊裘釣煙雨

江南新體

郎船江下泊妾家樓上住朝朝暮暮間上下兩相顧相
顧不相親風波愁殺人

子淵送牡丹

有酒何孤我因花賦惱公可憐秋鬢白羞見牡丹紅海
上盟鷗客人間失馬翁不知衰病得禁得幾春風

寄山臺趙庶可

頂上山臺謁臨行辱贈詩相思寸心在莫訝尺書遲好
月登樓夜清露落木時見君花萼集夢到謝公池

峽山二首

山近江如束林深路欲迷平沙印虎跡絕壁聽猿啼綠
水人誰釣黃茆地可畦幽居堪避世何必武陵溪

欲訪飛來殿維舟上峽山有溪流屋下無路入雲間屏
解捐金索猿能記玉環無從旌往事有地足躋攀

重陽舟中

扁舟何寂寞絕不見人家無處沽村酒何從問菊花溪
山澹相對節序謾云嘉牢裏烏紗帽西風日又斜

江上夜坐懷嚴儀卿李友山

江清天影動樓近角聲雄楊柳枝枝月芭蕉葉葉風佳人難再得良夜與誰同別後知何處吟詩句句工

舟中

扁舟何處泊沙渚夕陽邊遠浦橫魚網高山起燒煙客行今老矣秋思日淒然且復開懷抱囊中有酒錢

訪徐益夫

仲蔚蓬蒿宅終朝只閉關無心與時競未老得身閒綠

繞廻除水青橫隔岸山客來新酒熟相對一酡顏

清明感傷

一笠戴春雨愁來不可遮清明思上塚昨夜夢還家歸
興隨流水傷心對落花晉原松下淚沾灑楚天涯

都中書懷

醉卧長安市思歸東海涯瓶餘殘臘酒梅老隔年花日
與愁爲地時憑夢到家鄉書三兩紙一讀一咨嗟

春日懷家

細數平生事何堪掛齒牙客遊兒廢學身拙婦持家開甕嘗春酒租山摘早茶關心此時節歸興滿天涯

劉興伯黃希宋蘇希亮慧力寺避暑

何處避炎熱相期遇寶坊萬松深處坐六月午時涼鐘磬出深屋江山界短牆醉來歸興懶留宿贊公房

訪嚴坦叔

麻姑山下泊城郭帶煙霞攜刺投詩社移船傍酒家沙禽時弄水柳夏飛花小酌未能了西樓日又斜

見趙知道運使

飽食武昌魚不如歸故廬盟鷗還海道問雁覓家書又
把鄉人刺來投使者車東園桃與李莫使看花疎

感寓

自覺心無愧何須座右銘人將金作塢吾以石爲屏年
老醫難療天寒酒易醒菊花香到死不肯就飄零

貧作負恩人爲何宏甫作

九陌塵中事三生石上身狂爲好詩客貧作負恩人十

載江村別扁舟塗水濱音書久不至得夢往來頻

登祝融

秋風吹拄杖直到祝融顛目擊三千界肩摩尺五天扶
桑暘谷畔青草洞庭邊雲氣無遮障分明在眼前

淮上回九江

江水接淮水扁舟去復回客程官路柳心事故園梅活
計魚千里空言水一杯石屏有茆屋朝夕望歸來

燕

聞說烏衣國低連海上村春來避霜雪秋去長兒孫華屋語如訴故巢多不存雙飛惱幽獨紅袖有啼痕

泉南

南地無冰雪常疑暖作災晝昏山霧合寒變海風來壠麥銜芒早梅花帶葉開客中歸未得歲事漸相催

吳子似

載酒櫻桃熟隈亭柳樹陰青山去人遠黃鳥話春深薄俗非吾道虛名愧此心休言今不古又恐如今

海陵光孝長老驥無稱山谷後也共談時事且說黃巖柑橘之美

俗子避形影僧家共往還高談犯時忌妙語發天慳霜後思新橘夢中歸故山何時免奔走終老白雲關

衡陽寫懷簡王景大趙俊卿

夢覺他鄉枕寒生半夜衾客程湖外遠秋意雨中深老馬尋歸路羈鴉憶故林家書連數紙難寫此時心

上封

樓臺逼霄漢窗戶納雲霓回顧千巖路如登萬仞梯泉
從山頂出雪壓樹頭低高絕無人境非僧不可棲

九日

今日知何日他鄉憶故鄉黃花一杯酒白髮幾重陽日
晚鴉單宿天寒雁叫霜客中無此醉何以敵淒涼

春陵道中

雲際尋行路時逢一兩家山川閒世界耕釣小生涯病
竹長新筍寒芒搖落花溪翁解延客連煮數杯茶

琵琶行

潯陽江頭秋月明黃蘆葉底秋風聲銀龍行酒送歸客
丈夫不爲兒女情隔船琵琶自愁思何預江州司馬事
爲渠感激作歌行一寫六百六十字白樂天白樂天平
生多爲達者語到此胡爲不釋然弗堪謫官便歸去蘆
山政接柴桑路不尋黃菊伴淵明忍泣青衫對商婦

伏龍山民宋正甫湖山清隱廻唐詩人陳陶故

圃曾景建作記俾僕賦詩

故人昔住金華峰面帶雙溪秋水容故人今住伏龍山
陳陶故園茆三間千載清風徐孺子門前共此一湖水
百花洲上萬垂楊白鷗羣裏歌滄浪故人心事孺子高
故人詩句今陳陶短衣飯牛不逢堯何如繡鞍上著錦
宮袍瓦盆對客酌松醪何如紫霞觴泛碧葡萄豆萁然
火度寒宵何如玉堂夜照金蓮膏吟成禿筆寫芭蕉何
如沈香亭北醉揮毫再三問君君不對目送飛鴻楚天
外細讀山中招隱篇超然意與煙霞會照影湖邊雙鬢

皓此計知之悔不早三椽可辨願卜隣荷鉗相隨種瑤草

會稽山中

曉風吹斷花梢雨青山白雲無唾處嵐光滴翠濕人衣
踏破瓊瑤溪上步人家遠近屋參差半成畫圖半成詩
若使山中無杜宇登山臨水定忘疲

高九萬見示落星長句賦此答之

天星隨地化爲石老佛占作青蓮宮東來海若獻秋水

環以碧波千萬重雲根直下數百丈時吐光燄驚魚龍
鳳凰羣飛擁其後對面廬阜之諸峰陰晴風雨多態度
日日舉目看不同高髯能詩復能畫自說此景難形容
且好收拾藏胸中養成筆力可扛鼎然後一發妙奪造
化功高髯高髯須貌取萬物昇沈元有數吾聞此石三
千年復化爲星天上去

題上虞縣信芳堂

河陽種桃彭澤柳歲歲春風誇不朽何如君種一池蓮

開向五月六月天紅粧當暑清無汗綠葉染風香不斷
坐令百里盡清涼天乃贈君雲錦段此花不可無此堂
主人姓字同芬芳更看堂後參差竹醉倚炎空舞寒綠

鄂渚張唐卿周嘉仲送別

武昌江頭人送別楊柳秋來不堪折漢陽門外望南樓
昨日不知今日愁英雄握手新相識人情正好成南北
酒闌人散最關情一鴈西飛楚天碧

江濱曉步

津頭曉步落潮痕行盡蒲根到柳根鴈影參差半江月
雞聲咿喔數家村求魚者下連筒釣乞火聽敲隣舍門
料得錦城無此景欲將圖畫寄王孫

鄂渚煙波亭

倚遍南樓更鶴樓小亭瀟灑最宜秋接天煙浪來三峽
隔岸樓臺又一州豪傑不生機事息古今無盡大江流
凭欄日暮懷鄉國崔顥詩中舊日愁

春日二首呈黃子邁大卿

野人何得以詩鳴落魄騎驢走帝京白髮半頭驚歲月
虛名一日動公卿頗思湖上春風約不柰樓頭夜雨聲
柳外斷雲篩日影試聽幽鳥話新晴

帝里風光二月新西湖幾隊踏青人杏花時節偏饒雨
楊柳門牆易得春或是或非塵裏事無窮無達醉中身
五陵年少誇豪舉寂寞詩家戴叔倫

梅

孤標粲粲壓羣葩獨占春風管歲華幾樹參差江上路

數枝裝點野人家冰池照影何須月雪岸聞香不見花
絕似林間隱君子自從幽處作生涯

清涼寺有懷真翰林運使之來

不特來觀德慶碑江山勝概六朝遺興亡了不關吾事
登覽胡爲作許悲梅爲有香竒似雪酒能無悶妙於詩
蘭蒲綠竹無人愛留取雲梢待鳳儀

廬山

山靈未許到天池又作西林一宿期寺是晉時陶侃宅

記傳隋代率更碑山椒雲氣易爲雨客子情懷多費詩
暫借蒲團學禪寂茶煙飛繞鬢邊絲

夜宿田家

笠笠相隨走路歧一春不換舊征衣雨行山崦黃泥坂
夜扣田家白板扉身在亂蛙聲裏睡心從化蝶夢中歸
鄉書十寄九不達天北天南鴈自飛

送滕審言歸長沙別

折柳亭前送故人平沙留得馬蹄痕雲生渡北迷行路

烟起江南認別村恨不與君同上道歸來無伴自開樽
西樓獨倚黃昏月欲倩飛鴻寄斷魂

中秋李漕冰壺燕集

諸亭環立一湖灣區界無多眼界寬蒼石傳爲僞劉物
綠波曾浴葛仙丹兩邊堤樹四時碧一片冰壺六月寒
咫尺雲煙接滄海須知此地有龍蟠

南安王使君領客湛泉流觴曲水

橫浦堂前舉一卮古榕陰下坐多時連朝好雨千山潤

昨夜新秋一葉知梅嶺鄉來逢行者蘭亭今日又羲之
家聲不墜風流在如見初寮說好詩

思歸二首

吟詩不換校書郎但欲封侯管醉鄉疎懶無成嵇叔夜
清狂似達賀知章安貧不怕黃金盡既老從教白髮長
百計不如歸去好子孫相對說農桑

老矣歸歟東海村長裾不復上王門肉糜豈勝魚羹飯
紈袴何如犢鼻褲是處江山如送客故園桐竹已生孫

分無功業書青史或有詩名身後存

江村晚眺

江頭落日照平沙潮退漁舟閣岸斜白鳥一雙臨水立
見人驚起入蘆花

都中冬日

脫却鶴裘付酒家忍寒圖得醉京華一冬天氣如春暖

昨日街頭賣杏花

清明感傷

客中今日最傷心憶着家山松樹林白石岡頭聞杜宇
對他人墓亦沾巾

訪舊

欲尋西舍問東隣兩卷都非舊住人惟有桑邊石池在
依然春水碧粼粼

附戴昺詩

字景明

春日偕兄弟侍屏翁遊晉原分得外字因集句

而成

春雨晴亦佳適與賞心會初日照高林幽泥化輕檻步
屢隨春風始覺天宇大章懷到空山逍遙白雲外青松
夾路生童童狀車蓋清川帶華薄陰壑生虛籟性達形
迹忘傲然脫冠帶薄暮方來歸月光搖淺瀨

上立齋先生一首以有官居鼎鼐無宅起樓臺

馬韻

靈岩一片雲曾爲作雨起風吹還故山松筠澹相倚秋
高霜露寒酒熟鱸魚美少寬憂世懷微醉有妙理

雜言

提壺勸我飲布穀催我耕我酒瓶已罄我田草正生荷
鋤理荒穢及時新雨晴秋來刈吾林庶得兩遂情

侍屏翁遊屏山分得水字

攜琴入空山脩竹翠相倚一曲千古心泠泠寄流水拂
雲卧白石冥搜契玄理有時采薪人歌聲隔林起

秋日過屏山菴

淒切抱葉蟬閒關樓樹禽入山本避喧復愛聆此音微

颶動夕爽薄雲散秋陰衆籟聞以靜片月生東林

納涼即事

炎蒸欣傍晚掃地坐寃涼入竹風逾冷生荷水亦香蟻行緣食几螢照落書牀聽得農人語今年稻穗長

侍屏翁領客遊雪峰分得生字

雪峰峰頂寺來此定詩盟山瀑分雲影松風亂雨聲眼
明春樹綠心醒曉鐘清未好言歸去塵中事又生

謝趙山臺見訪

寂寞海東頭慙慙貴客舟如何經歲約祇作一宵留清
玩分行篋高吟壓小樓更須謀再會同醉菊花秋

安居

安居元自好春晝更遲遲雪涌煎茶鼎雲生浴硯池裁
荷填廢沼移竹補疎籬猶有閒光景欹眠續舊詩

項宜父涉趣園

四面山廻合中間百畝畦入門惟見竹遶屋半栽梅果
熟霜前樹魚肥雨後溪秋來饒景物斟酌費詩材

玉峰登眺得初字

玉峰奇絕處短策步崎嶇海近潮聲壯山空樹影疎吟
情危眺外飲興薄寒初數點新來鴈高飛不羨渠

次韻屏翁新秋

簡默新秋事天公賜已豐秋牀梧葉雨曉袂竹林風閑
世心先老傷時酒易中誰將和戰議細與問元戎

次韻晚春一首

開襟塵欲滿刮眼得新詩風絮遺春恨煙光隔歲期爭

抽蟲半蝕櫻熟鳥先窺光景渾如此心閒即好時

次韻屏翁初夏會芳小集

一觴還一詠竟日醉難成坐石驚雲濕臨池愛水平密林宜午蔭啼鳥尚春聲更有櫻桃約明朝且願晴

亦龍弟覆蕡累石作亭其陰屏翁名曰野亭索

詩謾賦一首

高懷抗塵外林梢着三間綠遠村邊樹青浮海上山
窮天變化心靜地寬閒鷗鳥知人樂忘機亦往還

秋晚

西風澄曉氣凝觀
悵幽情草潤蛩聲滑
松涼鶴夢清吟懷
更水靜病思得秋輕
忽憶登高近循籬看菊英

鄭安道終歲相聚臨別以詩見詒次韻爲謝

解把詩言別那無計可留梅花兩心事寒鴈五更愁我亦高懸榻君須獨卧樓後回相憶處莫返雪中舟

夏曼卿作新樓匾曰瀟湘片景來求拙畫且索

詩

有此一樓足悠然
萬慮忘拓開風月地
壓斷水雲鄉
四野留春色
千峰明夕陽
眼前無限景
何處認瀟湘

山家小憩即景效藥名體

柴門通草徑茅屋桂枝間脩竹連翹木高松續斷山仰
空青蔭密掃石綠花斑傍澗牽牛飲白頭翁自閒

從板橋買舟上青陽

卸馬板橋西扁舟逆上溪水鍬巖骨斷煙截樹頭齊野
鴨驚人起村雞上樹啼老農頭雪白猶自把鉏犁

五禽言

提葫蘆沽美酒人世光陰春電走一日得醉一日閒
綠鬢幾曾俱白首沽酒沽酒有酒沽生前不飲真愚夫
不如歸去不如歸去千山萬水家鄉路今年又負故園
花來歲花開定歸否歸去歸去須早歸近日江湖非舊
時

脫却破袴脫却破袴蠶熟繅成霜雪縷小姑織絹未落
機縣官火急催官賦輸了官賦無零落破袴破袴還更

着

麥熟鋤磨麥熟鋤磨村南村北聲相和大男小女總欣
欣煮餅蒸糜任渠做鋤磨鋤磨莫等閒去年糠粃無得
餐

幽樓

幽樓頗喜隔叢喧無客柴門盡日關汲水灌花私雨露
臨池疊石幻溪山四時有景常能好一世無人放得閒
清坐小亭觀衆妙數聲黃鳥綠陰間

初遊方巖山

圖志舊嘗有紀載杖藜今得徧經行漁翁化石幾年釣
仙客有田何世耕千尺枯崖脫龍骨一簾飛瀑撼雷聲
相傳逸少曾來此惜不鐫巖記姓名

如京至西興阻風雨

月將圓夜出鄉關纔到西興月又殘老去問名先已懶
近來行路覺尤難雲煙漠漠吳山暗風雨瀟瀟浙水寒
識破人生真逆旅此身何處不堪安

嚴子陵

赤伏君王訪舊遊富春男子只羊裘一竿本爲逃名去
何意虛名上釣鉤

天台道上早行

箇輿軋輋過清溪溪上梅花壓水低月影漸收天半曉
兩山相對竹雞啼

石倉歷代詩選卷二百五

欽定四庫全書

石倉歷代詩選卷二百六

明 曹學佺 編

宋詩八十三

高 登

還山招陳希韓

乾坤莽回互日月相盪摩百年纔瞬息萬類總么麼是
身非我有造物如吾何觸事會心少幽棲發興多眷言

意所適樂此山之阿脩篁擢新榦老木榮舊柯谷聲傳
地籟松韻答天和獨石介而安寒泉淡無波園蔬掇纖
嫩名菓仍駢羅細葛着雨花碧卷受風荷隨意坐莓苔
綺衣掛薜蘿得酒即酩酊作詩共吟哦嘯長情浩蕩舞
短影婆娑妻孥鹿門趣黃綺商山歌崎嶇路辭迢迢遞
誰見過父親憶同調出處夫靡他每憐傷弓禽因感赴
燭蛾自覺此身浮相看雙鬢皤人事何時休歸來勿蹉跎

跔

思歸

忽忽已秋杪言歸欣有期節物想吾廬青藥繁東籬流
匙白雲子蘸甲黃鶩兒對此憶羈旅多應歌式微喜慰
倚門心愁銷舉案眉稚子闌簷隙遠膝牽人衣歸興念
如許兼程猶苦遲明朝秋色裏烏帽風披披

冒寒行風雨有感

號風撼枯枿凍雨凝路塵乾坤秘日月八荒同一雲遙
知沙漠寒黯淡愁殺人天涯望不極流淚滿衣巾

卷二十六
杜門

故人方謝客爲問意如何午枕清風足夜窗明月多易招惟酒聖難遣是詩魔一榻君家事何妨獨我過

夢遊故山

風際鼇披鶴雲根杖策鳩幽棲知好在歸夢故難留山放數峰出泉分一派流把茆何日辦縛屋護松楸

送元太

但得身長健何妨鬢已華胸藏爲錦繡筆走是龍蛇作

椽只三語讀書空五車
卷懷已良計去去卧煙霞

水漲謝邑宰送米

心知一字不堪煮矻矻窮年黃卷中食粥由來未爲拙
儲瓶況乃嗟屢空今君好賢媿韓愈賤子受賜慚盧仝
春水從教遼舍北癡兒不復啼門東

中秋對月

繡江再見中秋月歲去月圓人尚缺相望千里共嬋娟
苦恨亭亭照離別今夕一樽誰與同孟光舉案對梁鴻

衆雛立侍儼成列以次持杯壽乃翁乃翁看月揩病目
手足傾頽頭髮禿但願團樂三十秋不計東西與南北

臨別示子

不能枉道取富貴是致爾輩愁饑寒頻年別離情更惡
兩地狼狽心何安從人數寄安否問使我想懷抱寬
平生竊笑曹家兒臨歧莫墮雙闌干

乞米

臣餓欲死侏儒飽方朔誰憐是歲星館下諸生笑豐暖

江頭漁父誚獨醒魯公已作乞米帖陶令旋尋儲栗餅
親舊依然眼相向故應特地爲吾青

小源欲歸

潮頰香醪暈醉紅鞶敲歸路勒青驄水涵萬頃曾孫稼
月逗盈衿少女風大誤平生緣畫足無聊中夜祇書空
擬將方守難論事直扣天門問化工

夜行道中

黃茆時節瘴煙濃人在山凹第幾重梁竦負才徒感慨

嵇康賦性本疎慵此生自斷天休問吾道當年世不容
會脫幘巾還舊隱鹿門妻子慣相從

言懷

歸去東皋獨荷犁家林書卷有兒持一無可意身將老
萬不如人心自知夢寐摩挲元結頌經從省憶少陵詩
體膚饑盡天難問依舊躍然山澤姿

九日

塞鴈南飛度戍樓一聲天地有餘秋家連滄海難窮目

人在蠻荒欲盡頭莫効涓渙裨國計況無毛髮爲身謀
所須菽水能多少踪跡飄然不繫舟

病中雜興

長袖深藏批敕手短筇斜倚作詩肩有時極目睨遼漢
興在孤鴻落照邊

附姚孝錫

閒居

無客訪衰殘柴門盡日闌耽書真是癖惜酒近成慳苦

徑行搜句茅簷卧看山却嫌明鏡裏偏照鬢毛斑

用峰山舊韻

春水上堤沙春晴散望賒衰年花近眼久客夢還家映
日孤鴻沒迎風雙燕斜平生江海意早晚送浮槎

次韻秋興

老畏年光速愁添旅夢多西風著梧竹歸思入烟波夜
永憑詩遣衰顏得酒和故溪千樹柳誰復曬漁蓑

謁滕茂實祠

本期蘇鄭共揚驪不意芝蘭失後凋遺老祇今猶涕淚
後生無復識風標西徑度鴈霜前塞滹水樵爭日暮橋
追想平生英偉魄凌雲一歎豈能招

次韻王無競見寄

客懷重寄仲宣樓白草黃雲塞上秋山色不隨塵世改
水聲還抱故城流隙中畏境都堪玩鏡裏衰顏抵自羞
多愧詩人苦相憶遠傳佳句弔清愁

感白髮

彈鋏憑誰聽客歌震雷那復化魚梭梳頭白髮驚新有
障眼玄花比舊多鄉間阻兵猶隔絕羈懷憑酒暫消磨
不須更問今朝客門外元無雀可羅

溪橋早春

輕黃未染柳梢勻連日溪風捲塞塵乍暖乍寒花信晚
相呼相喚鳥聲頻少勤謾挾經綸策老懶空餘病患身
追憶故園桃李樹年年紅紫爲誰新

登樓有懷

老愧憑欄目力昏
百年懷抱向誰論
晴空鴈起雲邊塞
夕照人歸郭外村
因憶昔遊驚迅晷
暫將離恨付清樽
誰人肯似邊居士
遠駕朱輪過雀門

歲晚懷二弟

少易成歡老易傷
壯遊垂白未還鄉
煙塵無復音書到
魂夢猶疲道路長
爆竹又驚新薦歲
屠蘇空憶舊傳觴
年年此日遙相憶
鴻鴈何時續斷腸

題柳溪別墅

雨霄風和不動塵
柳邊攜酒賞晴春
頻來溪鳥潭相識
渡水穿花不避人



石倉歷代詩選卷二百六